


# CELEBRACIÓN EN OS COTOS (na igrexa)

7 de xaneiro do 2024

## FESTA DO BAPTISMO DO SEÑOR



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INXUSTIZA E ABANDONO,  
COS REFUXIADOS E MARXINADOS DA SOCIEDADE,  
COA NATUREZA MALTRATADA,  
CON RESPONSABILIDADE COIDADORA ANTE A COVID-19  
**E SEMPRE SEMENTANDO PAZ**



## 1.- ENCONTRO DA COMUNIDADE

(tod@s de pé)

@ monitor/a está na sé

**SAÚDE DE BENVIDA**

**CANTO** 🎵 n° 65 *Imos compañeiros imos*

### *Celebrante:*

Benvidos sexamos todos a esta celebración. Reunímonos para compartir a fe en comunidade desfrutando da presenza de Xesús no medio de nós. Facémolo no nome do Pai e do Fillo e do Espírito Santo.

Con esta celebración pomos fin aos días de Nadal, por iso hoxe celebramos o bautismo de Xesús. Recordamos cando el se achegou ao río Xordán para alí ser bautizado por Xoán, o bautista. E naquel momento foi presentado por Deus coma o seu Fillo benquerido, o preferido, alguén a quen vale a pena escoitar.

Tamén hoxe o apóstolo Pedro fala de Xesús, e dinos que vale a pena aprender del, pois pasou facendo o ben e estando á beira dos oprimidos polo mal.

E agora somos nós, os bautizados, os que queremos seguir os seus pasos. Queremos escoitalo nos refuxiados e nos pobos que buscan acollida e paz, e queremos facelo crible sendo unha comunidade na que facemos ben.

Da man de Xesús, seguindo as súas pegadas, medremos, e con nós medrará a vida de todos.

## PROCLAMACIÓN DO GLORIA

**Celebrante:** *Estamos rematando os días de Nadal. Durante este tempo acompañounos un himno “o Gloria”. Hoxe volvémoslo proclamar con María e Xosé, cos pastores de Belén, e cos magos de Oriente.*

TODOS: *GLORIA AO SEÑOR NAS ALTURAS  
E NA TERRA PAZ*

*OU CANTO* 🎵 *nº 66 Gloria ao Señor nas alturas*

Cantémoslle cos anxos, cos pastores,  
cantemos con María e con Xosé,  
a gloria e a paz que nace en Belén.

TODOS: *GLORIA AO SEÑOR NAS ALTURAS  
E NA TERRA PAZ*

Cantémoslle cos pobres e cos pequenos,  
a quen Deus lles procura tanto ben,  
a gloria e a paz que nace en Belén.

TODOS: *GLORIA AO SEÑOR NAS ALTURAS  
E NA TERRA PAZ*

Cantémoslle ao Deus que nos visita,  
que mostra na humildade o seu poder,  
a gloria e a paz que nace en Belén.

TODOS: *GLORIA AO SEÑOR NAS ALTURAS  
E NA TERRA PAZ*

## ORACIÓN PROPIA DO DÍA

**Celebrante:** *Rematamos a primeira parte da celebración presentando no silencio o que rebule no noso interior, e sexamos agradecidos coas persoas que asumiron á súa responsabilidade para que fóramos bautizados.*

*(silenzio)*

**Celebrante:**

Deus, Noso Pai, cheo de tenrura e misericordia, cando Xesús foi bautizado no río Xordán, Ti proclamáchelo o teu fillo benquerido.

Concédenos a nós, os teus fillos adoptivos polo bautismo, sermos merecentes sempre do teu amor.

Pedímoscho polo mesmo Xesucristo, que viviu en familia e reina por sempre eternamente. Amén

## 2.- PROCLAMACIÓN DA PALABRA DE DEUS

**(sentad@s)** a palabra de Deus proclámase dende o ambón

**Celebrante:** *Escoitamos agora o ben que fala Pedro de Xesús. El por experiencia puido comprobar o ben que o facía todo.*

*No evanxeo acompañamos a Xesús no día do seu bautismo. El ben sabía o que facía, xa non era un bebé. Como adulto faise protagonista da súa decisión.*

## LECTURA DO LIBRO DOS FEITOS DOS APÓSTOLOS

Daquela tomou Pedro a palabra e dixo:

- Abofé, vexo que Deus non fai distinción de persoas, senón que acepta ao que lle é fiel e practica a xustiza, sexa da nación que sexa. El mandoulle a súa palabra aos fillos de Israel, anunciándolle a Boa Nova da paz por Xesús Cristo: este é o Señor de todos.

Vós sabedes o que pasou en toda a Xudea, comezando desde Galilea, despois do bautismo que Xoán predicou: como Deus unxiu con Espírito Santo e con poder a Xesús de Nazaret, que pasou facendo o ben e curando a todos os que estaban asoballados polo mal; pois Deus estaba con el. E nós somos testemuñas de todo o que fixo no país dos xudeos.

### Palabra do Señor

🎵 68 Con un sombreiro de palla SALMO

(en pé) Leccionario II B páx Mc 1, 7-11 EVANXEO

## PROCLAMACIÓN DO SANTO EVANXEO SEGUNDO MARCOS

Daquela Xoán proclamaba:

- Detrás miña está a chegar o que é máis forte ca min, ante quen non son digno de prostrarme para lle desatar os amallós do seu calzado.

Eu bautizo con auga, pero el havos bautizar con Espírito Santo.

E aconteceu por aqueles días que chegou Xesús desde Nazaret de Galilea, e Xoán bautizouno no río Xordán. E de seguida, mentres saía da auga, viu abrirse o ceo e baixar sobre el, coma unha pomba, o Espírito Santo. E unha voz deixouse oír desde o ceo:

- Ti es o meu fillo benquerido, o meu preferido.

### Palabra do Señor

(sentad@s) gardamos uns instantes de silencio para acoller a palabra no corazón



O apóstolo Pedro ten moi claro que el **MEDROU NA FE SEGUINDO AS PEGADAS DE XESÚS.**

Lembrar hoxe aquel día no río Xordán é darnos conta da responsabilidade que temos coma crentes de seguir nós as pegadas de Xesús. Non somos simples espectadores.

Camiñamos da súa man porque El é exemplo, como exemplo temos que ser nós hoxe, se queremos ser cribles. As nosas palabras e feitos teñen que deixar pegada, e déixana cando pasamos por esta vida facendo o ben e pondo o mellor de nós para que as cousas se fagan mellor.

## Fagamos de todo o ano “Bo Nadal”



(en pé) **PROFESIÓN DA FE**

*Celebrante:* Neste encontro parroquial no que lembramos o bautismo de Xesús, e co que rematamos os días do Nadal, renovamos as nosas promesas bautismais querendo ser coherentes na fe na que nos axudaron a medrar os nosos pais. Dicimos:

*Creo Señor, pero aumenta a miña fe*

*Monitor/a*

*Credes en Deus Pai,  
creador do ceo e máis da terra?*

*Creo Señor, pero aumenta a miña fe*

*Credes en Xesús,  
o seu fillo benquerido,  
que naceu de María, viviu nesta terra,  
deu a vida e resucitou de entre os mortos?*

*Creo Señor, pero aumenta a miña fe*

*Credes no Espírito Santo,  
na Igrexa, na comunión dos santos,  
no perdón dos pecados e na vida eterna?*

*Creo Señor, pero aumenta a miña fe*

*Celebrante:* Esta é a nosa fe, esta é a fe da Igrexa que nos alegamos de confesar en Xesucristo noso Señor. Amén.

## ORACIÓN UNIVERSAL

*Celebrante:* Oremos agora a Deus Pai, que no bautismo nos recoñece coma fillos amados seus. Oremos dicindo:

### GRAZAS POLO TEU FILLO, SEÑOR

#### Monitor/a

✓ Por todos os bautizados en Cristo, para que pasemos coma El facendo o ben e coidando de todos e de todo. Oremos

✓ Polas nais e pais cristiáns para que ao presentaren os seus fillos para o bautismo, sexan conscientes da súa responsabilidade de ser e dar bo exemplo. Oremos

✓ Polos nenos e nenas desta parroquia para que atopen cariño e ledicia, e para que medren sendo ilusión e esperanza nesta nosa comunidade de Os Cotos. Oremos

✓ Por nós, reunidos nesta celebración na que lembramos o bautismo de Xesús, para que medremos da súa man, deixando atrás o Nadal e atrevéndonos a ser adultos sendo e dando exemplo de evanxeo. Oremos

✓ Por todas as persoas que por culpa da violencia se atopan nunha vida que non vale absolutamente nada. Oremos

*Celebrante:* Escoita Pai as oracións dos que a Ti acudimos e fai que camiñemos sempre coma fillos teus, crentes e cribles, da man de Xesucristo, noso Señor. Amén.

## 3.- OS SIGNOS DA COMUÑÓN CON DEUS E COA COMUNIDADE

### NOSO PAI

*Celebrante:* Deus Pai ofrécenos ao seu Fillo Xesús para que o escoitemos, e Xesús convidanos a que nos acheguemos a Deus e nos sintamos nas súas mans de Pai, por iso agora coma bautizados en Cristo rezamos como El nos aprendeu: NOSO PAI ...

### SIGNO DA PAZ

*Celebrante:* As nosas mans abertas e tendidas uns para os outros expresan a nosa vontade de ser coherentes nos feitos. Fomos bautizados con Cristo para sermos irmáns, e sómolo agora facendo crible entre nós os camiños da paz. Non deixemos de facelo ben. Deámonos a paz.

🎵 **nº 36 Fagámola paz irmáns**

### COMUÑÓN

*Celebrante:* Hoxe, como igrexa, seguímonos reunindo para compartir a ledicia de ter xa a Xesús no medio de nós, non xa coma neno de Nadal senón como adulto bautizado que cos seus feitos vai deixando pegada.

*Ditosos nós que hoxe somos convidados a ser crentes e cribles participando desta mesa do Señor.*

*Señor, eu non son merecente de que entres no meu fogar, mais unha palabra túa abonda para me salvar*

**CANTO 55 🎵 No colo da miña nai**

#### 4.- AVISOS E DESPEDIDA

##### ORACIÓN FINAL

###### **Celebrante:**

Señor, seguros da túa bondade pedímosche que acollendo con fe a palabra do teu fillo, tamén nós merezamos, polo bautismo, chamarnos fillos teus e sérmolo de verdade nas nosas palabras e feitos de xustiza e paz que nos fan crentes e cribles e cos que queremos facer mellor as cousas.

Pedímoscho a Ti que vives e reinas con nós por sempre eternamente. Amén

*Xesús no Bautismo é o Fillo benquerido do Pai.*

*Nós non somos espectadores, participamos do seu bautismo collendo a súa man e seguindo o seu exemplo.*

*As pegadas de Xesús son pasar pola vida facendo o ben e loitando polos que son oprimidos polo mal: os refuxiados, os sen voz ante a inxustiza, as vítimas de abusos e violencia, os pobos que só soñan con vivir en paz, os enfermos ... e todos os que non están tendo unha vida digna como persoas.*

***Que acertemos a refacer vida tendo un bo día,  
unha boa semana,  
e o Señor nos bendiga, † nos garde de todo mal  
e nos leve ao seu fogar de vida eterna. Amén.***

*Avísase das misas (ver folla do mes)*

Este debuxo familiar acompaña o papel de solicitude de bautismo cando os pais manifestan o seu compromiso de ser e dar exemplo de fe aos seus fillos.



Seguindo as pegadas de Xesús nós temos que deixar a pegada de que ser bautizados vale a pena.



**“Este é o meu fillo benquerido”**

*Palabras do evanxeo de hoxe*